

Baluwa jhukutumbula jha Petile Ulongolelo

Baluwa jha kutumbula jha Petile ikajhandikwe na ntenga Petile. Petile akatumbwii kujhandika baluwa jhake kwa kukikilenga jwenio meneke na bhando ghane abhajhandikila. Baluwa jhenje abhajhandikila bhando bhoha bhubhanhobholela Kilichitu, bhimbhapechangine pannema ghoha, bheniya ndi kila kipinde mu baluwa jhenje bhikemwa “akaghene,” chula jha 1:1, 1:17 na 2:11. Nhwalo baluwa jhake ilandine na baluwa jha Pauli kwa Akaepecho, bhando bhamahela bhihobholela kubhe baluwa jha kutumbula jha Petile ikajhandikwe mu kipinde chikibhandikii muchaka cha makome chita na nhwano pabhelwikwa njwe Yecho Kilichitu. Petile akajhandike baluwa jhenje patamita ku kilambo chuku Loma chehemo jhainkemita Babilone, mu chula jha 5:13.

Petile alenga kubhehe aijhandike baluwa jhenje nhwalo gwa, “Kunkangamalicha mwojho na kulonge kubhehe kuhenga kongo umbone gwa Chapanga ndi chakaka,” mu chula jha 5:12. Kubhii kulandana pakate jha 1Petile mu chula jha 2:11-3:7 na Akaepecho 5: 18-6:9 na Kolochai 3:18-4:6. Chula yenio itato ilangii matyango ghambone mu lilongo na kujhokanikii ilongoche. Hele abhakangamalicha mwojho bhando bhoha bhubhanhobholela Kilichitu

bhaimbilile mang'ahe nhwalo kupeheke kwa nnema kubhandikile, mu chula jha 4: 1.

Ghughabhii mukitabo

Petile akichimulii jwenio kwa bhabhajhandikila, mu chula jha 1: 1-2.

Kabhele inchengu Chapanga nhwalo gwa ughombokeko, bhando bhoha bhipalwa kujhingii mwenio na nike mana jha ughombokeko gwenio mu ughome gwabhe, mu chula jha 1:3-2:10.

Kabhele abhalaghii bhando bhibhahobholela Kilichitu bhatame maha pannema na abhachimuli ilebhe twe ngita kutangatilana akanalome na akakeghe na mmanda na munahota gwake, mu chula jha 2:11-4:11.

Kubhoke penia Petile abhakangamalicha mwajho bhabha akaimbalilu pibhakongana na malagho, mu chula jha 4:12-5:11.

Kabhele Petile ajhomole baluwa jhake, mu chula jha 5: 12-14.

¹ Ne Petile, natenga jwa Yecho Kilichitu.

Ninyandikila mangota bhuhaghulilwe na Chapanga, bhumpechengine na kubhehe ngita makaghehe kwenio ku kilambo chuku Ponto na ku kilambo chuku Galatiya na ku kilambo chuku Kapadokiya na kilambo chuku Asiya na ku Betaniya.

² Chapanga Tate akaumanye mangota kuhumii makacho na ngahagwila, atendingine manyahinyahi kwa Uhuke gwake, nhotole kunyokanikiya Yecho Kilichitu na kuchukwa kwa miyahe jhake.

Tunnyopelangana umbone na uteeke gwamahele kubhoka kwa Chapanga.

Lihobholelo lilibhii ghome

³ Tunnombe Chapanga, Tate jwa Bhambo gwito Yecho Kilichitu! Kwa kiya jhake ngolongwa ngabhatupila ughome nhyono mu lihobholelo kwa kuyokecha Yecho kuhumii kubhawile,

⁴ bhahe, tulole kupata mota twe ya Chapanga yabhabhekii bhandō bhake. Mota yenio ibhola jhe amu ihangabhika jhe amu itundingii jhe, ibhii kunane kwa Chapanga kwa nhwalo gwino.

⁵ Na mangotamwe mulondwa na makakala gha Chapanga kwa ndela jha kihobholelo, kupala mpatangane ughombokeko ghupakubhonekana kipinde cha kupehekeya.

⁶ Nhwanganile kwa kilebhe chenie bhahe, ata anda ngohe kwa kipinde kichokombe mmi ngolongonde na kulagha kwa majhighanikilo ndii.

⁷ Kujhighanikilwa kwenioko kupala kumanya kihobholelo chino kibhii bhole. Ata chaabo ndi kilebhe cha kuhangabhika nambo ade ijhighanikilwe pamwotu. Helahela kihobholelo chino kilebhe chambone kuliku chaabo, ade nnyighanikilwe kupala nkwime. Ndi pumpa kupoke chipwa na ung'alicho na ichima mu lichiko Yecho Kilichitu papakubhonekana.

⁸ Pamonga jwenio manamona jhe mipala, kabhele pamonga mumwona jhe, minnyeketela na kubhehe na kiheko changachimulika chikibhii na ung'alicho twe,

⁹ nhwalo mipoke ughombokeko gwa uhuke gwino ndi nhwalo gwa kihobholelo chino kwake.

¹⁰ Akalondole bha Chapanga bhakalingukiye na kulingukiya ughombokeko gwenio na ngabhalondwila kubhehe umbone gwa Chapanga ngampekiya mangota.

¹¹ Ngabhajhighita kumanya kipinde ghane chipa kubhehe kilebhe chenie chikipa kupitila. Yane kipinde chapwepwita Uhuke gwa Kilichitu jwakibha nkate jhabhe ngalondwila malagho ghighapa kunkolela Kilichitu na ung'alicho ghupa kukengama.

¹² Chapanga akayekulile akalondole bhake kubhehe lihengo likibha jhe kwa nhwalo gwabhe bhene, nambo kwa nhwalo gwino ngita chililonge Lilobhe lya Mbone kwa makakala gha Uhuke gwa Chapanga kubhoka kunane. Ilebhe yenio ata akatumiche bha kunane kwa Chapanga bhakapahi kuilolekeya.

Lukemo lwa kutama nyahinyahi

¹³ Ngohe bhahe, nkoto kukihibhuka. Bhahe, milibheke lihobholelo lino lyoha mu umbone gholo ghupakupelwa kipinde Yecho Kilichitu papakubhonekana!

¹⁴ Anda yana innyokanikii Chapanga, mangalogwa jhe kabhele kukengama tama mbajha ngita kipinde chimikibha mandindilima.

¹⁵ Nambo ngita Chapanga jwakemengine chab-hii hela jwanyahinyahi na mangota mipalwa kubhehe nyahinyahi mu matyangii ghino ghoha.

¹⁶ Nhwalo Majhandiko gha Chapanga ghilonge, “Mmangana manyahinyahi, nhwalo nenga nanyahinyahi.”

17 Mangota pumunnyopa Tate, jhola jwahad-abuu kila mundo kulengana na itendwa yake changannoleke kumiho, bhahe, ntamangane pan-nema ngita makaghene mu kuntembekeya Chapanga.

18 Na mangota mmanyeye kubhehe nkombolilwe chi kwa ilebhe ihangabhika kwa feza amu chaabo na nphoto kubhoka mu matyangilo ghino ghangandanela ghumpokii kuhumii kwa tate gwino,

19 nambo nkombolilwe kwa miyahe jha chamane hake jha Kilichitu, jwakibha ngita mwana limbelele jwangalemala amu libaka.

20 Jwenio akahagwulilwe na Chapanga nnema nakupanganwa jhe, na ngayekulilwa machiko ghakujhomolela ghano kwa nhwalo gwino mangota.

21 Kwa ndela jhake, mangota muhobholela Chapanga jwayokicha kubhoka kubhawile na kumpeke ung'alicho, yenio kuhobholela kwino na lihobholelo libhaha kwa Chapanga.

22 Nhwalo ngohe nnyelewike kumwojho kwa kujhokanikiya chakaka, kupala mapale akajhino changabhonekana nambone, bhahe, mupalane kwa mwojho ghoha.

23 Nhwalo kwa ndela jha Lilobhe lya Chapanga lilibhii ughome, mangota mmelwikwe nhyono, chi ngita yana chibhelukwa na tate jwawegha, nambo jwatamikii machiko ghoha ghangapeta.

24 Ngita Majhandiko gha Chapanga chighalonge:

“Kila mundo abhii ngita mahamba,
na ung'alicho gwake ngita lilobha lya kwanyahe,

nhwalo mahamba unyala na malobha upuluta.

²⁵ Nambo lilobhe lya Bhambo litamikii machiko ghoha ghangapeta.”

Lilobhe lyenio ndi Lilobhe lya Mbone lilitangichwe kwino.

2

Yecho ndi lighanga lina ughome

¹ Yene mughalekengane ghangandela ghoha na uwange na kukitenda maumbone, wiho na malobhe gha maligho ghakoto kubhehe kabhele.

² Ngita chibhii yana ilemba chibhapala mabhele, na mangotamwe hele mipalwa kubhehe na kilolo chukunywe mabhele gha uchakaka gha ki uhuke, kupala nkolangane na kukombolelwa,

³ ngohe, umanye kubhehe Bhambo ndi jwaumbone.

⁴ Munnyendelele Bhambo! Jweniojho ndi lighanga lighome lilikanitwe na bhando, nambo lijheketilwe na Chapanga kubhehe lighanga lilihobholeka.

⁵ Mangota munnyendelele jwenio ngita maghanga maghome, nchengwite na kubhehe nyumba jha kihuke. Natumika ngita akapiya matambiko gha nyahinyahi, kumpikii matambiko gha kihuke ghijheketelwa na Chapanga kwa ndela jha Yecho Kilichitu.

⁶ Nhwalo Majhandiko gha Chapanga ghilonge: “Nnola! Meka lighanga ku Chayune, lighanga lilihaghulilwe lya nchinge na lina ichima. Mundo jwapala kunhobholela jwenio nakola jhe hone.”

⁷ Kwino mangota bhimilihobholela lighanga lyenio ndi lya chamane hake, nambo kwa bhangalihobholela lighanga lyenio ngita Majhandiko gha Chapanga chighalonge:

“Lighanga lilikanitwe na mapunde kuchenga, ngohe lyenio ndi lighanga likolongwa lya nchinge.”

⁸ Kabhele Majhandiko ghilonge:

“Lighanga lyenio ndi lighanga lya kukobhala, Lindalabho lya kwagwikii bhando.”

Bhando ukobhala nhwalo gwangalihobholela lilobhe lya Chapanga, yenio ndi bhakapangilwe kuhumii makacho.

⁹ Nambo mangota ndi bhando lilihaghulilwe, na kubhehe akapiya matambiko na unahota nkolongwa gwa nyahinyahi, kilambo cha nyahinyahi, bhando bha Chapanga jwenio, nhoto kutangacha itendwa ikolongwa ya kukangacha ya jwenio jwankemingine kubhoka mulubhendo na kujhingii mulumule lwake lwa kukangacha.

¹⁰ Makacho mangotamwe makibha mabhando bha Chapanga jhe, nambo ngohe mangota ndi bhando bhake. Makacho mangotamwe makapatite jhe kiya jha Chapanga, nambo ngohe mpatangine kiya jhake.

Ntame ngita akatumiche bha Chapanga

¹¹ Makalongo bhango, nimpembekeya mangota ngita makaghene na bhapeta ndela pannema pano, nnekane na tama jha yegha jhikanana na uhuke gwino.

¹² Mma na matyangilo ghamaha pakate jha bhando bhangaumanya Chapanga, kupala anda

bhakopokii kilebhe changanandela, bhaibhona itendwa hino yamaha bhannumbalila Chapanga lichiko lyaipala kuhika Bhambo.

¹³ Majhokanikiya bhando bhubhabhii na ukindendeke bhibhabhekitwe na bhando kwa nhwalo gwa Bhambo: Munahota nkolongwa jwabhi na kindendeke kikolongwa,

¹⁴ amu ilongoche ihaghulilwe na jwenio kwa-hadabuu bhibhahenga ghangandanandela na kalumbalii bhibhahenga ghambone.

¹⁵ Nhwalo Chapanga ipala nphoto kupyata nnomo malobhe gha kimbebehebhe gha bhando bhangabhehe na malango kwa itendwa yambone imuhenga.

¹⁶ Ntamengana ngita bhando bhangatabhwa, nambo gwangatabhwa gwino ukoto kubhehe kihobhelo cha ubhoho, nambo ntamangana ngita akabhanda bha Chapanga.

¹⁷ Mwatembekeya bhando bhoha, mwapala ajhino bhibhahobholela Kilichitu, munyoghope Chapanga na muntembekeye munahota nkolongwa.

Kulandanikii mang'ahe gha Kilichitu

¹⁸ Mangota makatumiche majhokanikiye akanahota bhino kwa utembekeho ghoha anda bhabhii ghambone amu manuu amu bhina kihokola.

¹⁹ Nhwalo anda nhimbilile mang'ahe ghangatope nhwalo gwa kuntembeke Chapanga, jwenio nampela mota.

²⁰ Bho, nanyambulila ndweko ghane kwa kuhimbilila kubulwa kwa malemo ghinteile? Nambo anda mibulwa kwa kuhenga ghambone

na mmii kuhimbilila gheniya, umanya Chapanga apakumpe mota kwa gheniya ghinteile.

²¹ Gheniya ndi ghinkemilwe, nhwalo jwenio Kilichitu akang'ahike kwa nhwalo gwino, nganekela nnandanikiho kupala nkengame ndela jhake.

²² Jwenio akatei jhe uhakaho, amu akalongii jhe kilebhe chochoha chuwange mu nnomo gwake.

²³ Palighitwa, akabhujhichii jhe, pang'ahika akayengii jhe, nambo ngauhobholila Chapanga jwahadabuu changalolekeya kumiho.

²⁴ Yecho jwenio ngagheghita uhakaho gwito payegha jhake pa nchalaba, kupala tulekane na uhakaho na kutama muughome kwa mambu ghambone. Kwa ilonda yake mangota nnamite.

²⁵ Nhwalo mangota mukibha ngita mambelele ghighahobhite, nambo ngohe mumujhii Nnucha na Nnonda jwa ughome gwino.

3

Jwatolile na jwatolelwa

¹ Mangota bhintolilwe, majhokanikiya akanganabhino, kupala anda abhii munalome jhojhoha jwangahobhelela lilobhe lya Chapanga, ajheketela papala kulola matyangilo ghino. Changapalwa kulonge chochoha,

² nhwalo chalola matyangilo ghino chighabhii ghambone na gha ichima.

³ Kukilembekeya kwino kwangabhehe kwa panja tujhe ngita kuloka mangongo na kuwala chaabo na ngobho ya bei ngolongwa.

⁴ Nambo kukilembelekeya kwino kutumbulila nkate jha mwojho gwino, uhalano gwangatundungila, yenio ndi uhuke gwa uhengwa na unuu ndi kilebhe chambone hake palonge jha Chapanga.

⁵ Yene ndi chibhakilembanikiya akakeghe bha makacho bhibhahobholila Chapanga, bhakilembanikiya kwa kwajhokanikiya akangana bhabhe.

⁶ Ngita Chala panyokanikiya Ulahimo na pankemita unganamundo. Na mangota ngohe mmii akachikana mundo anda ntei ghaumbone changajhohopa kilebhe chochoha.

⁷ Hele na mangota akanalome bhitolile, ntamangana na akaana bhino kongo umanye bheniya akaleghelau. Yene matendela kwa kwatembelekeya nhwalo bhene hele nabhapokela pamonga na mangota hupo jha ughome gwampeke Chapanga. Peniya ndi kujhopa kwino nakujheketelwa.

Kung'ahika kwa kuhenga ghaumbone

⁸ Kukujhomolela nilonge naha, mma mwojho ghumo na nholela ghamo na mmonelana kiya, mpalane anda akalongo, mma akanuu na kunyenyekehana.

⁹ Mangalepechela bhando ubhoho kwa ubhoho anda jhe maligho kwa maligho, nambo majhopela mota, nhwalo mangota nkemitwe na Chapanga nhoto kupoke mota.

¹⁰ Ngita Majhandiko gha Chapanga chighalonge:

“Mundo jhojhoha jhola jwaupala ughome na kughabhona machiko ghaumbone,

nnomo gwake gwangalonge jhe ghanganandela
na lulime lwake lwangalonge jhe uwange.

¹¹ Jwenio ajhepa ghanganandela,
ahenge ghambone,
apalaha uteeke nu kukamulila.

¹² Nhwalo miho gha Bhambo ghalolekeya bhando
bhibhahenga ghaumbone
na machikilo ghake ujhokanikii kujhopa kwabhe,
nambo Bhambo abhalangii kihogho bhando bhib-
hahenga ghanganandela.”

¹³ Bho, ghane jwapala kumengwa mangota
anda nnyendelii kuhenga ghaumbone?

¹⁴ Nambo anda mipalwa kung'ahika kwa
nhwalo gwa kuhenga ghapala Chapanga, mina
mota mangota. Mangampwele jhe mundo
jhojhoha hilu mangabhehe jhe na kiholo.

¹⁵ Nambo mnnombe Kilichitu ngita Bhambo mu
miojho jhino. Machiko ghoha nhoto kunnyanguu
kila mundo jwapakunkonya nhwalo gwa man-
hobholelo ghino ghighabhii mu miojho jhino.

¹⁶ Nambo ntendengane yenio kwa unuu na
ichima. Mma na mwojho gwangakilangii kub-
hehe na malemwa, kupala bhala bhibhanchon-
jola matyangii ghino ghaumbone anda bhando
bhibbahobholela Kilichitu, bhabha na hone ndii.

¹⁷ Nambo mbaha kung'ahika kwa kuhenga
ghaumbone, anda apahi Chapanga, kuliku
kung'ahika kwa kuhenga ghanganandela.

¹⁸ Nhwalo Kilichitu ngang'ahika na kuwe mala-
jhimo tu nhwalo gwa ubhoho gwa bhando bhoha,
mundo jwamaha nga jhumo ngawila kwa nhwalo
gwa bhando bhangandela, kupala kumpeleka
mangota palonge jha Chapanga. Ngakomitwa

kiyegha nambo ngabhekwita kubhehe ghome kwa uhotolo gwa Uhuke gwa Chapanga,

¹⁹ na kwa ndela jha jhojho Uhuke gwa Chapanga ngajhenda kuitangachii ihuke hela ibhii mu kipungo.

²⁰ Bheniya ndi bhibhankanita kuntembeke Chapanga pabhalendila kwa kwahimbilila kipinde cha Nuho palenganikiya chapina. Mu chapina jhene bhakajhingii bhando bhandina tu yane bhando nane tu bhibhakombolilwe mu mache,

²¹ mache gheniya ghalandanichwa na ubaticho ghukunkombo mangota ngohe. Na chi ubaticho ghukunda luku lwa payegha, nambo ndi lilaghano lya Chapanga lilitendike kwa mwojho gwambone kwa ndela jha kuyoka kwa Yecho Kili-chitu.

²² Na jwenio ajhawii kunane kwa Chapanga na ngohe atamite lubhoko lwalelo lwa Chapanga. Ndi jwalongocha akatumiche bha kunane kwa Chapanga, na bhina kindendeke na bhina makakala ghoha.

4

Ughome nhyono

¹ Nhwalo Kilichitu akang'ahike kiyegha na mangota hele mipalwa ghughakengama matyangilo ghake, nhwalo mundo anda ang'ahike kiyegha ipalwa alekane na uhakaho.

² Kutumbulii ngohe kwa utamo ghuhighalike kwa kutama kwino pannema pano, mipalwa kulongochwa ngita chaipala Chapanga na chi kutama kwa kunkengemii tama mbajha jha kimundo.

³ Kipinde chikipetita, machiko ghamahela nhengita ilebhe ngita ibhatehila bhando bhangaumanya Chapanga. Ntamita kwa kupala kukihanga na kukipala mabhene na kulobhela na bhulo na ntamita mukuhenga ngongola, kulobhela, kulobhela kwa kupetecha na kuhenga ilebhe ya hone na kuijhinamii inyagho.

⁴ Ngohe bhando bheniya bhangaumanya Chapanga bhitenda kukangacha pibhannolekeya mmijhe pamo na bheniya mu kuhenga mughanganandela gheniya hake ndi nhwalo bhinighingana.

⁵ Nambo nabhapalwa kujhanguu ilebhe yenio palonge jha Chapanga, jwakilenganikiye kwahad-abuu bhibhabhii ghome na bhubhawile.

⁶ Nhwalo gwa Lilobhe lya Mbone lilitangichwa ata kwa bhando bhubhawile, anda bhahadab-wilwe muughome gwabhe kiyegha ngita bhange, bhatame kwa nhwalo gwa Chapanga kwa ndela jha Uhuke.

Ntumiche jwaumbone jwa Chapanga

⁷ Kujhomoke kwa ilebhe yoha kubhandikile, bhahe, ntamangane maha, nkeluwa mukunny-opa Chapanga.

⁸ Kuchocha kwa gheniya ghoha mpalane mabhene kwa mabhene kwa mwojho ghoha, nhwalo mapalano ghayekelila ghangandanandela twe.

⁹ Mpokelane kajhino mabhene kwa mabhene changakokaleka.

¹⁰ Kila mundo pakate jhino ipalwa kukitumii kitoi champeki Chapanga kwajhangatii bhange

bhando. Anda ntumiche jwaumbone jwa hupo ya ndela yamahele yapatite na Chapanga.

¹¹ Mundo jwatangacha pa bhando malobhe ghake ghabhaha malobhe gha Chapanga. Anda apala kuntumikii atumika kwa makakala ghapata kuhumii kwa Chapanga, kwa ilebhe yoha Chapanga alombwe kwa ndela jha Yecho Kilichitu. Nhwalo ung'alicho na makakala ndi ghake machiko ghoha ghangapeta. Amina.

Kung'ahika nhwalo gwa Kilichitu

¹² Makalongo bhango bhinimpahile, makan-gacha jhe kwa majhighanikilo majhundupaho ghimikongana nako na kulola kubhehe nakon-gana na kilebhe changachimulika.

¹³ Nambo nhwanganila kubhehe mulombana mu mang'ahika gha Kilichitu kupala papakubhujha kabhele mu ung'alicho gwake nhoto kuhanganila hake.

¹⁴ Anda bhinongama kwa nhwalo gwa liina lya Yecho Kilichitu ndi mota kwino nhwalo Uhuke gwa ung'alicho yane Uhuke gwa Chapanga utama nkate jhino.

¹⁵ Angabhe jhe mundo pakate jhino jwang'ahika kwa nhwalo gwa jwaikoma amu likwatulo amu jwatenda ghangandanela amu jwakomanicha bhando.

¹⁶ Nambo anda ming'ahika kwa nhwalo gwa Kilichitu, bhahe, angakola jhe hone, nhwalo mundo ikemwa nkilichitu.

¹⁷ Kwa nhwalo kipinde cha luhadabulo kikitite na kitumbulii kwa bhando bha Chapanga, ndi twenga, bho, kujhomolela kwake nakubhaha

bhole kwa bhando bhangajhokanikiya Lilobhe
lya Mbone lya Chapanga?

¹⁸ Ngita chighalonge Majhandiko gha
Chapanga:

“Ndi ijhundwipe kwa bhando bhibhabhii na
matyangilo ghamaha kughombolelwa,

bhahe, naijhundupa bhole kwa bhando bhangan-
nyopa Chapanga na bhina uhakaho?”

¹⁹ Kwa gheniya, bhando bhibhang'ahika kwa
kuhenga ghapala Chapanga, bhipalwa bhakib-
heka pahe jha Npanganwa jwabhe ndi jwakun-
hobholeka hake, kwa itendwa yabhe yambone
ibhahenga.

5

Lilongo lya bhando lilinnyeketii Kilichitu

¹ Nenga ng'ogholwike pakate jha ilongoche bha
lilongo lya bhando lilinnyeketii Kilichitu, ndi
jhunighawene mang'ahe gha Kilichitu. Nane
mbakubhehe pamonga mu ung'alicho ghupala
kuyekulilwa. Nimpembekeya hake mangota akai-
longoche ajhango kubhehe,

² mulilonde lilongo lya bhando bha Chapanga
libhankamwiingine, mililonde chi anda ntei ku-
chokolekelwa, nambo kwa kupala ngita chapala
Chapanga. Nhenga lihengo lyenio kwa kupala
kunnepa jhe, nambo kwa mwojho gwino gwoha.

³ Mangalongocha jhe kwa makakala bheniya
bhimalongocha mulilongo lino, nambo mma
nnandanikiho kwa lilongo lyenio.

⁴ Na Nnucha Nkolongwa papakuhika, mangota nampokela hupo jhu ung'alicho jhangatundingila.

⁵ Hele machikangombo mipalwa kui-jhokanikiya ighogholo. Mangota mabhoha mipalwa kunhengelana kwa utembekelo, nhwalo Majhandiko gha Chapanga ghilonge, "Chapanga ubhakana bhando bhibhakikweya nambo bhapela bhando umbone bhina utembekelo."

⁶ Ntende utembekelo palonge jha Chapanga jhuna makakala, kupala anyinule kipinde chamaha.

⁷ Mnekele Chapanga malola ghino ghoha, nhwalo jwenio ndi jwantunja muughome gwino ghoha.

⁸ Mma miho na nkelukiya! Nhwalo likoko lino, Limbembela ilyungalyunga ngitalihimba lilikuluma liyema mundo limmemene.

⁹ Mukanile Limbembela na kubhehe nganganga mu kihobholelo, mmanyiningine kubhehe ajhino bhibhahobholela Kilichitu pannema ghoha bhakongana na mang'ahe ngita gheniya hele.

¹⁰ Pighapitii mang'ahe kwa kipinde tu, Chapanga jwabhii lihembuko lya umbone gwoha na jwankemingine nnyingii muung'alicho gwake gwa machiko ghoha ghangapeta kwa kulombona na Kilichitu Yecho, jwenio ndi nakamilicha na kumpeke makakala nnyeme maha mu chinge.

¹¹ Kwa Chapanga kubhaha na ukindendeke kwa machiko ghoha ghangapeta. Amina.

Nyambucho jha kujhomolela

¹² Ninyandikiline baluwa jhenje nyipe andan-gatila Silwano, nnongo jhunimanya nu kunhob-holela. Mbala nikangamalicha mwojho nu ku-longe kubhehe kuhenga kongo ndi umbone gwa Chapanga gwa uchakaka. Ntangamane ngan-ganga mu umbone gwenio.

¹³ Na lilongo lya bhando lilinnyeketii Kilichitu ajhino bha pamba ku Babelone abhahagwii pamo na mangota bhinyambucha. Na Maluku mwanango mu kihobholelo inyambucha.

¹⁴ Nnyambuchana kulangii upalo gwa Kilichitu. Uteeke gwa Kilichitu ubhaha pamonga na mangota bhammii na Kilichitu.

Ndendeule

Ndendeule: Ndendeule (New Testament) for Tanzania

copyright © 2020 The Word for the World International

Language: (Ndendeule)

Contributor: The Word for the World International

The New Testament in Ndendeule Language.

The Word for the World

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-01

PDF generated using Haiola and XeLaTeX on 1 May 2025 from source files dated 1 May 2025

463e1ded-27ea-5916-a8ed-170cdb8d87e3